

## AUTORSKE NOVINE

izdanje za maj/svibanj 2014.

### SADRŽAJ:

- Akcija pomoći ugroženom stanovništvu od poplava
- Održana sjednica Skupštine AMUS-a
- Nagrada stručnog žirija AMUS-a na festivalima u Mostaru i Banjoj Luci
- Francis Gurry je novi-stari generalni direktor WIPO

### Akcija pomoći ugroženom stanovništvu od poplava

Zbog teške situacije u područjima pogođenim poplavom, u akciji pomoći koja je, zbog hitnosti situacije, organizovana veoma brzo te je od ideje do realizacije proteklo manje od 20 sati, donirana je i transportovana konzervirana hrana, mlijeko, hrana za bebe, pelene i sredstva za higijenu u vrijednosti od 2000,- KM u saradnji sa organizacijom pomozi.ba u subotu 17.05.2014.

U ovoj akciji su učestvovala 34 člana Udruženja: Arnautalić Ismet, Arslanagić Damir, Babović Nedim, Boban Ranko, Bregović Goran, Bukovica Emir, Čardžić Damir, Dervišhalidović Edin, Imamović Nedžad, Jukić Suad, Lazić Saša, Lojo Amil, Mangafić Ibrahim, Mašić Nardin, Merdžanović Nedžad, Muharemović Dino, Mujagić Samir, Podany Vladimir, Radić Gordan, Ražnatović Hamza, Rizvanbegović Zijo,

Salihbegović Hamo, Sarihodžić Maja, Sarihodžić Mahir, Smajlović Almas, Sučić Davor, Sulejmanović Mahir, Šaran Edin, Šehić-Karamešić Amra, Šehić Amir, Šenkovski Mirko, Šukalo Dino, Trnka Muhamed i Varešanović Hajrudin. Posljedice poplava će, nažalost, trajati dugo tako da će ovo biti samo prva u nizu akcija koje planiramo pokrenuti.



## Održana sjednica Skupštine AMUS-a

U Centru za mlade u Sarajevu je 24.aprila/travnja održana redovna Skupština AMUS-a. Skup je pobudio najveću pažnju muzičkih autora u posljednjih 20 godina. U radu Skupštine učestvovalo je preko 100 autora iz Sarajeva, Banjaluke, Tuzle, Mostara, Doboja i drugih gradova širom BiH.

Edin Dervišhalidović je jednoglasnom odlukom pristunih članova ponovo izabran za predsjednika Skupštine AMUS-a. Skupština je izabrala Julija Marića za potpredsjednika. Na upražnjeno mjesto u Upravnom odboru izabrana je Maja Sarihodžić a u Nadzorni odbor Skupština je imenovala Hamzu Ražnatovića, Almasa Smajlovića i Ziju Rizvanbegovića. Predsjednik Dervišhalidović se zahvalio dosadašnjem potpredsjedniku Ismetu Arnautaliću i predsjedniku Upravnog odbora Vladimiru Podaniju na doprinosu u dosadašnjem radu.

U radnom djelu Skupštine usvojeni su ponuđeni dokumenti od strane Upravnog odbora. Usvojen je novi Statut Udruženja, te Godišnji izvještaj za 2013.godinu i veoma ambiciozan Plan i program rada za 2014.

Skupština je zauzela stav o nizu aktuelnih tema koje se tiču socijalnog statusa umjetnika autora, pravnih osnova penziona i socijalne zaštite, prijedloga za izmjene postojećih zakona o Javnim RTV sistemima, kao i drugim pitanjima važnim za autore.

## Nagrada stručnog žirija AMUS-a na festivalima u Mostaru i Banjoj Luci

U cilju podrške autorima kao i skretanju pažnje javnosti na važnost autorskog rada, AMUS od ove godine dodjeljuje stručnu nagradu na muzičkim festivalima u BiH. Na festivalu Melodije Mostara održanom 25.04.2014. u Mostaru uz direktan TV prijenos na BHRT nagradu je u ime stručnog žirija AMUS-a dodijelio Ranko Boban za pjesmu "Stari moj" koju potpisuju Alen Slavica i Ante Gelo. Na Međunarodnom



dječijem muzičkom festivalu u Banjoj Luci održanom 10.05.2014. uz prijenos na RTRS nagradu je uručila Maya Sarr za kompoziciju „Ne želim da odrastem“ koju potpisuju Mladen Matović i Tihomir Preradović. U perspektivi su dodjele nagrada i na festivalima koji se održavaju u toku godine kao npr. Bihački festival u septembru kao i Festival „Iliđa“ u novembru ove godine.



## Francis Gurry je novi-stari generalni direktor WIPO

Konsenzusom država članica Svjetske organizacije za intelektualno vlasništvo (WIPO) Francis Gurry drugi put je imenovan kao Generalni direktor Svjetske organizacije za intelektualno vlasništvo za mandat u trajanju od 6 godina. Novi mandat počinje teći od 01.10.2014. godine.



Gdin. Gurry je četvrti Generalni direktor Svjetske organizacije za intelektualno vlasništvo, odmah nakon Dr. Kamila Idrisa iz Sudana (1997-2008), Arpad Bogscha iz SAD-a (1973-1997) i Georga Bodenhausena iz Nizozemske (1970-1973).

Inače, Svjetska organizacija za intelektualno vlasništvo (World Intellectual Property Organization – WIPO) je jedna od najznačajnijih međunarodnih organizacija koje djeluju u području autorskog prava, ali i industrijskog vlasništva osnovana 1967. godine donošenjem Konvencije o osnivanju Svjetske organizacije za intelektualno vlasništvo. Svrha joj je promovirati i na međunarodnoj razini usklađivati zakonske propise o autorskom pravu kako bi se olakšao izvoz tehnologije u zemlje u razvoju i tako pomoglo njihovu razvitku. WIPO promovira razvoj efikasnih mjera za zaštitu intelektualnog vlasništva i usklađivanje nacionalnog zakonodavstva, obavlja administrativne poslove vezane uz primjenu Bernske konvencije, potiče izradu i donošenje međunarodnih ugovora o intelektualnom vlasništvu, pruža pravne i tehničke savjete državama članicama te naručuje i provodi istraživanja o autorskom pravu.

Gospodin Gurry se obratio delegatima prihvatajući imenovanje sljedećim riječima: „Vjerujem da je osnovni izazov s kojim se susrećemo kao Svjetska organizacija za intelektualno vlasništvo postići generalno razumijevanje značaja, doprinosa i vrijednosti intelektualnog vlasništva ekonomskom, društvenom i kulturnom razvoju“

Delegati predstavnici država članica su čestitali gdinu. Gurry i pozdravili dostignuća koja je Svjetska organizacija za intelektualno vlasništvo postigla za vrijeme njegovog prvog mandata, uključujući i usvajanje dva nova ugovora na polju autorskih prava kao i sve inicijative vezane za razvoj.